



Яковлев Арсентий Пантелеевич вордскемын 3 мартэ 1932 арын, Кукмор ёросысь Важашургуртын, крестьян семьяын.

Быдзым Отечественной война кутскыку мыным тырмемын вал 9 арес. Мынам анай-атаелэн 4 пинальёсыз- 4 пиосыз, соос полысь мон вал самой бадзымез пинал. Атае кошкыз войнае мобилизациен, но 1 арскын со берлань бертиз малярия висёнэн висьыса. Мон со аре йылпумъяй начальной школаез. Война мынон аръёс туж секыт луизы. Тужгес но секыт луиз нылкышноослы, оже соос келязы кузпальёссэс, пиоссэс, вылаз ик вань бусы ужъёс кылизы соос вылэ, ваньзэ ужано кыын. Нош пинальёсыз маин сюдоно? Соин но ми пичиысен ик котьма ужез но ужамы ини. Школаын дышетскыку милемыз потто вал колхоз бусые арам берысь кылем зег йыръёсыз октыны. Кин уногес октиз сое премировать каро вал, шорем нянь вылэ чечы зыраса. Кыче бадзым шумпотон вал со милемлы чечыен нянь.

Начальной классэз гуртын дышетскыса йылпумъям бере, 5 классэ мыни Старо-Учинской школае. Отын дышетскыку уг тырмо вал тетрадьёс но учебникъёс, чернилаос. Горд чукындэрлэн вуэныз но гождяськимы. Отын дышетскыку ял дыръя, каникул дыръя потиськом вал колхоз бусые анайёслы юрттыны аран доры. Араськом вал сюрлоен. Кожы вуэм бере каждой семьялы 2 гектарен люкыса сёто вал. Потиськом вал отчы сое кусоен турнаны. Кыче секыт вал со милемлы, пичиослы, со кожыез турнаны! Одигаз дышетскон аре мон туж юн виси но кема школае ой ветлы, дышетсконлэсь но бере кыли. Анайме жаляса со сизьылэ мон пинал вальёсын усый кизем бервылэз. Азыло ведь кизизы кыын пазяса, сое сюе согон понна усыйно вал. Вань бусы ужъёсты ужано вал кыын но вальёсын. Соку тракторъёс ой вал на. Уждунэз толязы туж ичи. Одиг трудоденьлы сёто вал 200 грамм ю-тысь. Сое нянь пыжизы картошкаен но портэм турыньёсын сураса. Абдратыса быдто вал облигацилы (заём шуыса нимаськиз) гождиськыны косыса. Ведь соку

колхозын уксё оз сётэ. Нимаське вал натуроплата шуыса. Со облигациез басьтыны тужгес трос тыроно луиз силен, курегпузэн, воен но мукетэныз. Соин милемлы асьмелы номыр но оз шедьы ни сиыны. Война вакытэ но анайлэн тыршеменыз, туж шуген ке но, скал вордимы, со милемлы туж юрттиз сиён-юон паласен.

Война вакытэ ми, школьникъёс, юрттимы на ещё кут кутаса. Каждой нунал одиг пар кутасько вал, сое кутаса од ке быдты шудыны но потыны уг лэзё вал коркасен. Соку кут кутаны тодисьтэмез ой вал дыр пинал. Лесникъёслы норма сёто вылэм кут люкаса сдавать карыны, милям анай толэзьлы быдэ 30-40 пар каре вал. Лесник сётэ беризь, пузэ асьмелы кариськом, кутьёссэ солы кутаськом. Нюлэскысь нинь лушкаса но нуллиськом вал. Берлогес тодимы ми, со кутьёсты Марий-Эльсы Суслонгер посёлоке но туж трос келяло вылэм, асьме палась муртъёс но луиллям отын. Отын туж трос ужаллям нюлэс дасянын но. Пленнойёс но трос луиллям.

Атае кулиз висыса 36 арес дыръяз. Со кулэм бере анае висиз чужектэмен. Со ачиз кулиз пересъмыса, 80 арес тырмыса вуымтэ на вал.

Толя нимо выны дышетскиз Ош-Юмья школаын. Дас классэз йылпумъяз со медален. Солэн классэн кивалтисез дэмлам солы документъёссэ Москва университетэ сётыны. Со озьы ик кариз, анае но оз пумитьясыкы, ачиз гинэ тодэм дыр, кызы со сюлмаськем со дыре. Быгатиз выны умой гинэ сётыны вступительной экзаменьёссэ, пыриз со дышетскыны физической факультетэ. Кык вынъёсы но Толялэн чектэменыз отчы ик Москвае пыризы дышетскыны, геологической факультетэ. Ваньзы туж тыршыса дышетскизы, умоем гинэ йылпумъязы дышетсконзэс. Собере кытчы назначить каризы отын ик ужазы. Тини озьы отын асьсэлэсь парзэс шедьтизы но отчы ик улыны кылизы. Соос табере пенсиын ни, но жаляса верано луйсько, соос полысь одигез кошкиз ини та дуннеысь. Тини озьы милям Москваын но родняосмы туж трос. Соос ми доры шумпотыса берто гужем, ваньзы люкасыкыса.

1947 арын мон мыни Казане ремесленной училищее. Отын дышетски 2 ар. Собере мон шеди ужаны распределениен казанской заводэ, отын ужай 5 ар мында. Собере потиз правительстволэн законэз, специалистъёсты колхозъёсы келяны. Мон кема ой малпа ни, бerti вордскем шаерам Вазашур гуртам. Ужай мон портэм ужъёсын, кытчы косизы отын. Нош гуртэ электро тыл пыреем бере ужай пенсие поттозам электромонтёр луйса.

1954 арын мон паръяськи гуртысьтымы ик туж чебер нылэн-Катяен. Мон соин паръяськи армие кошкытозам ик, кышкай лэся сое мукет пиос лушкалозы шуыса. Со монэ витиз 3 ар но 4 толэзь, улиз мынам семьям ик. Армиысь бертыса чош улыны кутскем бере, вордимы ми 5 пинал, 3 пиос но 2 нылъёс. Али улиськом кузпалэным Валерий нимо покчи пимылэн семьяяз.

Юрттиськомы али но хозяйствоын. Мукетъёсыз но пиналъёсмы уло асьсэ
семьяенызы, шумпотыса берто вордскем юртамь.

Арсентий Пантелеевичлэн верамезъя гожъяз начальной классын дышетись
Раиса Ивановна Кошкина. 1 март, 2014 ар.